

Siob

Tunien usil moulien onen Siob

Siob 1:1-22

1 ¹En avong mulamu, meatin tai ro en kantri ten out Us, isen Siob. Ka kei musil kat Ahi ka va netan mini lises. Kei vi more meatin tai koa saki en onen mutolas, mul lei kat rev i kei ka en rovattei voum vatisa. ²Natnali oulu (7) ka natnahin etel (3). ³Sipsip keil osen rokol taosen oulu (7000), **kamel** keil osen rokol taosen etel (3000), buluk keil osen taosen tai (1000), ka dongki keil osen avi handred elim (500). Meatin toumien keil onen emun avi houlu vis avi houlu mok. En out ist, kei vare i vi meatin koa tounah onen houlu lohlin meatin savsav vasi keil.

⁴Natnali keil, lises amul amum retai en marmari anien keil. Navong tai en keil mumon anien en teim sen, kei sisil en tunali savsav keil ka ahinali keitel. Navong akanian ka amunmun evus, uva ris teim se. Ka rovitei tuetin, tateisav mumoni mukonetinek rokol koa oulu (7) en keil. ⁵Ka en avong vasi koa mari anien keil one evus, Siob san selusien va ven keil keke isak motein moulien one. Evus, en visokon semau katau en mari anien one, kei mea ka san retai en sanien min Ahi en usite one. Lises, Siob mumoni mukonek keke avato ris en meten Ahi, veni mundemi vit vahesa etai en keil mumon etai tounah koa romaltei en meten Ahi koa kei reingeingeni.

⁶En avong tai, en out nesa, angelo keil umai avati keil en meten Ahi Asuv. Ka Temat emun mul ral min keil. ⁷Ka Iahova visi vit, “?Keik, koka kave?”

Temat vit risi mini vit, “Naka ko, nuva ko, ka namules naretoun en out netan.”^a

⁸Ahi visi vit, “?Keik koles more meatin toumien onak Siob? Meatin tovuol en out netan valong kat nau ka vatahos vasuval kei. Kei mul va netan minau ka losil kat rev i kei keke romumon etai tounah vatisa.”

^a 1:7 Sen 6:2

⁹ Temat vit kesi mini vit, “?Mukave? ?Komundemi keke Siob heles heha netan minuk munak kikulat tokolkatien onom ran moulien onen?^b
¹⁰ Lises, koring koe kei, onen keil ka tounah vasi keil onen. Korokol kat vasi tounah keil koa kei mumoni ka buluk, sipsip ka dongki keil emun osen avi houlu vis avi houlu mok, avilelau en out vasi. ¹¹ Ka munak kilah lat tounah keil enek rani, kosa etin, kei hesilik en metom.”

¹² Iahova viteni mini vit, “Tahos. Namaen tounah vasi keil onen hel en hem. Ka konatokolteis aven.” Evus, Temat mea va.

¹³ En avong tai, natin Siob keil amul akanian ruai en teim sen tue koa moeite. ¹⁴ Ka en avong enek, eiloheh tai muloh va ven Siob ka vit, “Memul memumon buluk keil osom amul akah atan, ka dongki keil osom emun amul akanian vesesal ven komai. ¹⁵ Memutimanin, ka me-Saba keil umai, amu vinvini vasi meatin toumien onom keil ka avenan buluk ka dongki vasi keil. Inau sesuk nalohosai keke numai navit meseini minuk.”

¹⁶ Navong mul veah selus, meatin toumien tamun onen mai ka vit, “Meatin toumien keil onom amul alei kat sipsip osom keil, ka ahil vil ka en out nesa, ka mita kan lin keil vasi. Inau sesuk nalohosai keke numai navit meseini minuk.”

¹⁷ Kei mun roselus vasitei mau, meatin toumien tateisav mai ka vit, “Meatin tahenaien keil ten out Kaldea ariti vas keil en vangite etel ka amuloh ven komai. Asal vini meatin keil toumien onom en naef one, ka alah vasi kamel keil osom. Inau sesuk nalohosai keke numai navit meseini minuk.”

¹⁸ Kei mun roselus vasitei mau, meatin toumien tateisav tamun mai ka vit, “Natmali keil ka natmahin keil amul akanian ruai en teim sen natmali koa moeite. ¹⁹ Memusil, mari eang koa kileiles ka en out volvol, mai muh lin eim va netan, mutakat vasi keil umatmat. Inau sesuk nalohosai keke numai navit meseini minuk.”

²⁰ Navong Siob long tounah vasi keil enek, longe tisa houlu. Sakini rali vas eisin omon, rei kokoteh hilin en vatin, retengeiril vita netan ka san houhouen min Ahi. ²¹ Kei vit, “Navong avasi inau, namai navi heite hon, ka navong nimat, nihi heite hon emun niha. Iahova san tounah vasi minau, ka kosa, kei kulat risi. Nihati lat isen Iahova.”

²² Avaseini tounah vasi tisa kistal en Siob, kei romumonte tisaen vuo vahiteni keke Ahi mumoni romaltei mini.

Ahi maen Temat keke vasak vis Siob hatte tamun

Siob 2:1-10

2 ¹ En avong tai, en out nesa, angelo keil umai ris avati keil en meten Iahova, ka Temat emun ro ral min keil. ² Ka Iahova visi vit, “?Keik, koka kave?”

^b 1:9 Rev 12:10

Temat vit kesi mini vit, “Naka ko, nuva ko, ka namules naretoun en out netan.”

³Iahova visi vit, “?Keik koles more meatin tounien onak Siob? Meatin tovuol en out netan valong kat nau ka vatahos vasuval kei. Kei mul va netan minau ka losil kat revi kei keke romumon etai tounah vatisa. Keik kovis nau mamaenuk kovapurun heisav eni enges, ka avaseini, Siob mules musil kat saki eni koa mutolas en metok.”

⁴Temat vit kesi vit, “Meatin tai kilea vasa lat tounah vasi onen keke vasakini vamoul. ⁵Ka munak kisasa kovapurun aven, nakilea keke kosas eke, kei hesilik vare en metom.”

⁶Sakini Iahova viteni min Temat vit, “Tahos, nimaeni hel en hem, ka konouasteis namat.”

⁷Evus, Temat va ran Iahova ka mumon marmari manu keil akikistal ka vasi aven Siob, vatin vita rokol tinealen keilu tanetan. ⁸Sakini Siob va, ka rondan en vulimeas en out amunit tahul ien. Kur sokeai koa kan ka mukal vahas manu keil onen eni.

⁹Ahin onen mai ka viteni mini vit, “?Keik komules kovuli kat mormore saki eni keil onom enges veah? Tahos imok kisili Ahi ka kimat.”

¹⁰Siob vit kesi mini vit, “!Keik komul koselus suval ahin koa vi vau! ?Mukave? ?Ir koa rokur kat tounah koa tahos en hen Ahi, reherkurtei tounah koa tisa emun?” Ka avaseini keke mahien onen Siob mariso, roviten etai tounah vatisa vaha kat Ahi.

Time etel onen Siob telmai veni keke telvasan enmahisien oneatel mini
Siob 2:11-13

¹¹Navong longlongien usil mahien onen Siob ka vasi out, time etel telraengoni. Iseatel vi Elivas ten out Teman, Bildat ten out Suah, ka Sofar ten out Namah. Navong telraengoni, telmai en rendemien keke telvaha telvasan enmahisien oneatel mini ka telvakatauni en selusien. ¹²Navong telmul semau soutin, telles Siob ka tellei rasi. Navong esuk telmai vesesal ka tellei kilea, tellonge tisa houlu ven tueatel. Sakini telmurang keih, telrali vas eisin omeatel, ka telrivin vulimeas vina en mesaiuai ka en vatiatel. ¹³Telva telro sasani avong oulu (7). Telrova rantei ka telro raeng enges veni telles mahien koa Siob mul kuri marite ramat.

Siob run kutut min Ahi ven mahien onen
Siob 3:1-13,25-26

3 ¹Navong aro mukonek avong oulu (7) evus, Siob selus esuk ka rin kat avong avasi eni.^c ²Siob vit,
³“!Ahi li, vahit kovasesenda en vongien koa avange kat inau eni,

^c 3:1 Ser 20:14-18

- ka kovasesenda mun en avong koa avasi nau eni!
- 4 Ahi eli, avong koanek, kihiles meneai teni hemai hehi vongien.
Konandem kattei mun avong enek.
Konoumontei mun meneai natitin eni.
- 5 Kumoni hehi avong ten malikelik
ka mankoli teni hemai hematetel imok.
Kiov koe meteiai teni
en mahmah keil.
- 6 Kikulat vongien enek hemea ran sua teni,
ka konamaentei anahuli ris.
- 7 Kumon vongien enek hehi lumalum,
isien onen tivava hau keil hetovuol eni.
- 8 Koakeil akur keihoen keke avasakin Levaetan^d vamea ran huinev ten atas,
kihiteni min keil keke isesenda en avong avasi nau eni.
- 9 Hitu ten menauilan, kihuli kati natitintei,
konamaentei vongien enek namai nahi meneai.
- 10 Kisesenda en vongien enek veni kei maeni avasi inau eni,
ka maeni nakur moulien keke nakilea makur mahien ka malonge vatisa.
- 11 Tahos imok vahit mamat en vangen mama onak,
vuo mamat en hati avong enges varei avasi nau eni.
- 12 ?Vensa mama onak ling nau en urulin?
?Vensa san susu minau?
- 13 Vahit mamat tuai en avong enek,
kosa, maseh revu ka marlongtei mun mahien.
- 25 “Tounah vasi nametauni, umai asut inau,
asas namundemko eni, mai kistal vi anatin.
- 26 Narkurtei tomat, rendemien onak mul konakon,
nasakras maseh veni mahien onak sakras vavus.”

Elivas sel kat Siob ven selkututien onen

Siob 4:1-9; 5:17

- 4** ¹ Evus, Elivas ten out Teman mea ka viteni min Siob vit,
² “?Munak niselus minuk, kivuroh?
Veni nasakras emun mato raeng.
³ Keik kovisein meatin keil houlu

^d 3:8 Levaetan vi mari mesau tai suval lerumrum koa amundemi avit kilea van meteiai keke hertitintei ten avong tas.

- ka kosan keihoen min koakeil he memerau.
 4 Navong meatin tai mot vuo aven memerau vuo aven litu,
 selusien onom katauni, ka kei mulomal eris.
 5 Ka kosa, vi avong onom komul en mahien,
 ka keik korvinvintei kovahisu vatali.
 6 Munak hehi anatin keke keik kuva netan min Ahi ka moulien onom
 mutolas en meten,
 hesakin desien onom hel ka demkoen hetovuol enuk.
 7 Kosa, kindem usili.
 ?Meatin koa sakien onen mutolas
 kilea vakur matien koa tisa? !Vuo!
 8 Inau nales koanik: meatin koa kil atan ten tisaen ka luh utiai keil
 tasakkalkalien ien,
 kosa keil akur hei sakkalkalien ka hei tisaen.
 9 Suval angu tai,
 Ahi mu lin keil en vurohien onen.
 5 ¹⁷Ka sien hel en meatin koa Ahi ralimal eni.^e
 Sakini, konavurohitei navong kei sel katuk.”

Siob vit usil usite onen min Elivas
Siob 6:1-3,24-26,30

- 6 ¹Siob vit kesi min Elivas vit,
² “Vahit avaling mahien keil onak ka sakvisien keil emun onak
 vaha en sikel tai,
³ keil akilea avameas valin veien vasi keil ten atas,
 sakini konatimanintei keke
 nselus vau ekek.
²⁴ “Tahos, kihiseinau. Kihit lati minau asa namumoni tisa.
 Inau nito raeng ka nilonguk kiselus.
²⁵ Selusien ten anatinien, keihoen mul ien,
 ka selusien keil onom vi heisav enges.
²⁶ ?Keik komundemi kovit kitalimal en selusien onak?
 ?Vensa kolong ras selusien onen meatin
 koa desien onen mot?
³⁰ “?Komundemi kovit namul naluvos?
 ?Komundemi kovit nasakras malei kilea
 avong takeih keil?”

^e 5:17 Pro 3:11; Hib 12:5-6

Bildat sel kat Siob vit mul kur mahien en hen Ahi ven tisaen keil onen
Siob 18:1-2,5,12-13,18,21

- 18** ¹Evus, Bildat ten out Suah selus min Siob vit,
² “Meatin keil asuvaluk asakras avato raeng.
 Munak kiha netan ka kito raeng, mekilea mevaselus minuk.
- ⁵ “Meatin keil amum tisa, asuval kandel koa amuh vini,
 koa ahang teni hermukantei mun.^f
- ¹² “Mulamu, tounah one houlu, ka kosa, amai kat keil.
 Mahien keil aro vesesal ven keil lises.
- ¹³ Mesaaien tatisaso tai ka vasi ave,
 mul sakin husi keil en he ka ale one mul maleles.
- ¹⁸ “Koakeil amum tisa, isila lat keil imea ran meneai, iha en mankoli.
 Imea ran out ten moulien, iha en out ten matien.
- ²¹ “Koanek vi keite ten moulien onen meatin keil amumon sakien
 tatisa,
 keite onen koakeil arkileatei Ahi.”

Siob sa kes selusien onen Bildat
Siob 19:1-3,21-22

- 19** ¹Evus, Siob vit kesi mini vit,
² “Vensa komul veah komumonau nales menelang en selusien
 keil onom?
³ Tuetin koselus tisa va kat nau.
 ?Kormemoutei en sakien koa komul kopurunau eni?
- ²¹ “!Tuak onak eli keil, emi hemahis nau li!
 Veni hen Ahi mul keih kat nau.
- ²² ?Vensa mimul misak purunau suval koa Ahi mul mumoni minau?
 ?Narlongtei veah mahien vavinvin en avek?”

Sofar sel kat Siob vit meatin tisa keil enges amul ales mahien en moulien one
Siob 20:1-2,4-5,27-29

- 20** ¹Evus, Sofar ten out Namah selus min Siob vit,
² “!Siob, kosakin tinok vepeng vareis!
 Nirto raengtei mun. Kosa, nihit kes selusien onom.

^f 18:5 Siob 21:17

4 “Kokilea revi keke en avong keil mulamu,
navong meatin keil amul rohtoh en out netan,
5 meatin keil avou lat tisaen ten avong tamureis,
ka sien onen koakeil amum tisa hevus hatte tas.

27 “Tounah vasi en out nesa avothot en tisaen one,
ka meatin keil ten out netan avitehiten anatinien va kat keil.
28 Suval mari oai, vurohien onen Ahi
hetavis vasi tounah keil one heha.
29 Koanek hekikistal en meatin keil amum tisa,
koanek keite ten moulien one koa Ahi vat kati min keil.”

Siob sa kes selusien onen Sofar
Siob 21:1-2,5-7,13-15,17,23-26,34

21 ¹ Evus, Siob vit kesi min keitel vit,
² “Mithelong revi asa mahiteni.
Munak emi vat mivoumon nau malonge vatahos, mithesan
ralingomitel enges.

5 “!Mithelele ka mitheles inau!
!Hesakin mithetimanin ka emitel hevon!
6 Navong namundem usil tounah koa sut nau,
alok maleilei ka namundemko houlu.
7 ?Vensa varei meatin tisa keil aro tahos?
?Vensa amatu ka ales amas en moulien one?

13 “Keil arokol keite ten moulien one en tomat,
ka umat en merauen.
14 Meatin tisa keil aviteni min Ahi avit, ‘Kiling komai mehel sasomai enges!
Emai rovattei mevailea sise keil onom.
15 ?Ahi vi isei keke meheha netan mini?
?Mehekur sa munak mehehis mini?’

17 “?Nengeis roles Ahi muh vini laet ten moulien onen meatin keil koa
amukonek?
?Nengeis avisu en avong takeih?
?Nengeis Ahi vuroh kat keil ka san mahien min keil?
!Vuo, rolestei vare!

23 “Meatin tai, en moulien vasi onen, mul les amas ka tomat.
24 Kei longe tahos rokol avong mat.
25 Meatin tamun, sien tovuol vare en kei.

En avong vasi onen, kei mul les mahien rokol matien.

²⁶ Keite ten moulien onealu vatte tas.

Lumat, arahin keilu, ka oul kan vasi teiai onealu.

³⁴ “?Ka kamitel, mitvit mitvoumon nau malonge vatahos en selusien keil koa vi heisav enges? !Vuo!

!Selusien vasi koa mitsani minau vi luvosien!”

Elivas vit Siob mul kan heite ten tisaen keil onen

Siob 22:1-2,4-5,10-11

22

¹ Elivas ten out Teman selus eris min Siob vit,

² “?Meatin tai kilea vasuvasuv en umen onen Ahi?

?Meteisauen onen meatin etai kilea vakatauni?

⁴ “?Mukave, Ahi mul ralimal enuk veni kovouhou mini?

?Vensa mul san mahien minuk?

⁵ Ahi mul mumoni minuk veni tisaen onom keil houlu vareis, ven sakkalkalien vasi keil onom.

¹⁰ “Sakini eitapolis keil houlu amul rahituk, annivul katuk ka metauen vilelau enuk.

¹¹ Mankoli mul koe out koa koro ien, kosakras kovalele. Mari oai mutaluh koe keik.”

Siob vit leini keke romumontei tounah koa tisa vasakini

vales mahien onen

Siob 23:1-7; 27:2-6

23

¹ Siob vit kesi min keitel vit,

² “Avaseini mitviten sa minau, niles niselus kutut kat Ahi hekeih, nasakras mahuli kat mahisien onak.

³ Hit eli varei mailea out mahotin Ahi ien keke mailea maha en out kei ro ien.

⁴ Vamukonek, mahit lein tounah keil en usite onak mini, ka mahit kilea anatinien ten selusien keil onak mini.

⁵ Ek vati mailea asa hehiteni, ka kei hehit kesi minau hemukave.

⁶ ?Mukave, Ahi hesa vasi keihoen onen heha kat nau? Vuo, helong nau navong niselus.

⁷ En meten Ahi, meatin koa mutolas kilea vaselus retavoai vatal mini. Kei hehitehiteni keke inau narmumon etai tounah vatasa keke meatin keil avalong kilea.”

- 27** ² “Avaseini Ahi ten Keihoen koa moul romumonteï vama minau
ka mumon moulien onak emai tisa,
naviteni li anatin en mini keke
³⁻⁴ ongok sakras vahiten luvosien.
Navong namul veah naleh eang koa Ahi sani minau,
nirviten etai tounah tatisa.
⁵ Hetokol avong nimat, nihit lati keke narmumon etai tounah vatisa,
nasakras mahiteni keke selusien onamitel koa va kat nau vi
anatin.
⁶ Namulomal keih en selusien onak keke moulien onak mal.
Rendemien onak muto navong namundem usil avong keil onak.”

Siob vit leini min Ahi keke usite onen muto en meten

Siob 30:20-23

- 30** ²⁰ Siob viso va min Ahi vit,
“Ahi, naviso vat minuk, ka korvit kestei nau vareï.
Navong navis, kolong seseinau.
²¹ Komumoni minau tisa vilehil vareis,
kosak purunau ral min keihoen onom.
²² Suval mari angu tai,
kovou lat nau vina nesa ka kokulul enau.
²³ Nakilea komul kokur nau maha en matien onak,
keite onen meatin vasi keil.”

Iahova sa kes selusien onen Siob

Siob 38:1-13,19-21,34-38; 40:1-14

- 38** ¹ Evus, Iahova selus min Siob ka en angu tai vit,
² “?Koa keik sei, komul kovis rendemien keil onak
ral min selusien koa vi heite hon koa meteisauen tovuol ien?
³ !Kilomal, munak kovit kovi meahos!
Kihit kes selusien koa mahisuk eni.
⁴ ?Komul kave navong namumon out netan?
Munak kokilea revï en tounah vasi, kihit usili minau.
⁵ ?Isei ling kat keite keilu teni?
?Isei kilea taveah teni?
?Keik kokilea?
⁶ ?Asa vuli kat vatiseng koa vuli kat out netan?
?Isei ling kat vati ahat ten out netan?
⁷ En avong enek, hitu keil ten menauilan amusau ruai,
ka angelo vasi keil ten out nesa amakul en sien.

⁸ “?Isei mumon vati vieh val koe atas^g

navong mue rohtoh ran anev ten atan?

⁹ Inau nakav koe atas en mahmah
ka nasakin mankoli mul koe.

¹⁰ Inau naling hakot en atas
keke sakras vahina vapurun atan.

¹¹ Inau naviteni mini navit, '!Keik kitokol out enek ka kosakras kovali!
Tahe takeih keil onom hemavul hehati heles en out enek.'

¹² "?Siob, en moulien onom,
keik komeng kat etai avong vamai valan?

¹³ ?Keik koviteni min meteiai vatitin vaka vasi out netan
keke vasil luvat koakeil asak kalkali ran out aro suai ien?

¹⁹ "?Keik kokilea out meneai ka ien
vuo mankoli kistal en out kave?

²⁰ ?Keik kokilea kovatie min keilu sise onealu mul kave?
?Vuo kovasila keilu luvaha ris en vulealu?

²¹ ?Keik kokilea kovoumoni? !Vuo, kosakras!
Veni arvasuktei veah ka sua onom keil rovinvintei.

³⁴ "?Keik kokilea kovamakul vahina min mahmah keil
ka kovasakin ous vamus vakasuk?

³⁵ ?Keik kokilea kovasakin ahil vahil,
ka kei val vatosin mengkatien onom?

³⁶ ?Isei san meteisauen onen min etai meatin,
vuo sakin rendemien onen vamaaluv?

³⁷ ?Isei vi metaluv vavinvin vahuli mahmah keil?
?Isei kilea vatah lin ous vous

³⁸ vasakin vulimeas vamai out vatas,
ka nehi atan keil ipilit kat keil?"

40 ¹ Evus Iahova vit risi min Siob vit,
² "Siob, kovit Ahi ten Keihoen mum romaltei.
!Keik koselus va kat nau, kihit kes selusien onak!"

³ Evus Siob vit kesi min Iahova vit,

⁴ "Iahova, naselus vau eli vareis. ?Nihit kes asa?
Inau nirviten etai mun tounah.

⁵ Inau naviten tounah houlu tuai keke marvitentei."

- 6 Iahova selus min Siob eris kistal en angu vit,
 7 “!Kilomal, munak kovit kovi meahos!
 Kihit kes selusien koa mahisi minuk.
 8 ?Keik komul kovatie lati keke inau namum romaltei?
 ?Keik koselus va kat nau keke kovasakinuk kovamal en meten
 mesav keil?
 9 ?Keihoen onom suval keihoen onak?
 ?Rem kilea vamakul vasuval voulul suval rek?
 10 Munak hemukonek, kilomal en houhouen onom ka tuvutien onom.
 Kisin en hetetamenien ka muohien onom.
 11 Kiles koakeil avut keil, kumon vurohien onom heha kat keil
 ka kumon rendemien one heha netan.
 12 Anatin, kiles keil ka kisakin keil iha netan.
 Kihe lin koakeil amum tisa en out amulomal ien.
 13 Kitahin keil vasi en atan.
 Kipar kat keil en out ten matien.
 14 Munak kokilea kovoumon tounah keil enek, inau varei nilamu
 nimasmasuk, ka nihitni keke keik kokilea kovoutut keik sasom.”

Siob vit leini keke selusien onen romaltei

Siob 42:1-6

- 42** 1 Evus, Siob vit kesi min Iahova vit,
 2 “Iahova, nakilea keke keik kokeih vis kokeih emok.
 Kokilea kovoumon vasi tounah koa em vati.
 3 Kovis nau nakeih kat meteisauen onom mukave,
 navong inau meteisauen onak tovuol.^h
 Naselus en tounah keil koa narkileatei,
 en marmari tounah koa nasakras mailea eni.
 4 Koviteni minau nitaengonuk navong koselus,
 ka nisak visi nihit kes selusien keil onom.ⁱ
 5 Mulamu, nalong kilea keik ka en asas koa naraengon meatin sav keil
 aviteni minau, ka kosa, nalei kilea keik esuk en metok varei.
 6 Sakini namemou en tounah keil naviteni.
 Nikur ris selusien onak, ka nikul en vulimeas vatie lati
 keke nalonge tisa houlu ven asa namumoni.”

Ahi san tokolkatien min Siob mulin tounah koa kuri mulamu

Siob 42:7-17

- 7 Navong Iahova selus min Siob evus, kei viteni min Elivas ten out
 Teman vit, “Tinok katuk ral time keilu onom, veni korselus entei

^h 42:3 Siob 38:2

anatinien enau vasuval more eiloheh onak, Siob, mumoni. ⁸Kosa, mihekur buluk oulu (7) ka sipsip oulu heha min Siob, ka mihesan keil hesuval sanien votut tai minau en usite onami. Siob hehis ven kami ka inau nilong hisien onen ka nirpuruntei kami hesuval koa mal keke mihekuri ven selusien tavaruen onami. Veni kami merselus entei anatinien enau vasuval koa kei mumoni.”

⁹Elivas, Bildat, ka Sofar telmumon asa koa Iahova viteni min keitel telvoumoni. Ka Iahova raengon hisien onen Siob en usite onealu.

¹⁰Navong Siob vis ven time keitel, Iahova rokol kat ris Siob en tounah keil onen ka ling kati hatte elu eris en tounah keil kei lahi mulamu.^j

¹¹Tunali Siob vasi keil, ka ahinali keil emun, ral min time sav keil onen umai asao eni. Keil amumon mari anien ral mini en teim sen. Asan enmahisien one mini ka akatauni ven mahien vasi keil Iahova sani mini. Tetai en keil san hati mani ka ring koa vi gol mini.

¹²Iahova rokol kat avong ekor onen Siob mulin sakien koa rokol kati mulamu. Siob, sipsip osen keil avi taosen teindan ehat (14,000), **kamel** keil avi taosen ahetai (6,000), buluk keil avi taosen elu (2,000), ka dongki keil osen avi taosen tai (1,000). ¹³Natnali keil oulu (7) ka natnahin keil etel (3). ¹⁴Natnahin koa moeite vise en Semaemah. Koa elu eni vise en Kesiah. Ka koa tasite en keitel vise en Keren-Hapuk. ¹⁵En out vasi en out netan, ahin keil atovuol koa avales keil avatahos imok vasuval natnahin Siob keitel. Ka tata oneatel sani min keil atan ka buluk ka sipsip keil suval koa sani min tueatel keil.

¹⁶Siob moul handred tai ka hanumau elu (140) eris. Ro taveah keke les havinali ka havinahin keil ral min titae keil emun. ¹⁷Navong Siob matu vis matu revi mok, emat esuk.